

S lött annerscht

S Läuete is häüt annerscht. S paßt nie zu dän Oewend. För ons worsch zätig, mir hocke schu seit e hal Stonn en di Köche, worte, bis di Glocke ofängt.

För di Läuete ous n Duurf is s villedcht ömmer noch ze bal: Halwer ocht; di Sonn läücht rüetlich di Häuser o, si kömmt zont, bu se so nieder stet, ach en di letzt Eck vu n Nochber sei Schloefkoommer. Grod för dii Menner is s ze bal, di bu zwesche fönnef und sechs Uhr vu di Fawrik komme sen. För di hot di Ärwet dehoi jo erscht oogefange. Di könne nie schu wär oufgehür, bann s dösse di Wise und Äcker su vil ze tun git.

zont=jetzt

dehoi=daheim

S Läuete is annerscht, annerschter bi vür ochze oder nönze Joehr, bu ich s letzte Moel ouf di Baank en di Köche gesesse ben. Bi ich doemols en di Sommerferie ömmer ouf n Duurf gewaast ben, hot s Gebaatläüete bedött, daß der Tog för mich röm woer, daß mei Komerode hoi moßte und ich aach.

Gebaatläüete=Gebäueläuten, Angeln

S Läuete is annerscht. S lött, ower s is koi Gebaat löttes. S lött zen Ruesekraanz för en Tuete, för mei Herrle.

Herrle=Großvater

Nocher mache mer ons halt ouf n Wag. Mir honn s nie weit bis nei di Kerch. Önnerwags worte se schu rachts und lenks o di Hoftürer: S Maarile, dort di Olga, vorn di Lydia, und ach en Schullehrer sei Fra.

Bi mer o ere verbeigenn, knouge se stomm und langsam mit n Koopf: Grueß, Teilnohm und Reschpekt zegleich, bevür se sich henner ons en di Kerch mache. A vu n Duurf dowe komme se rei mit gesenkte Köpf. Ouf n Kärfich spille Kenner Fangeles. Si wern leis, bi se ons mit onner schworze Kloeder häre säeh komm.

knouge=knaugen, nicken, verneigen

Kärfich=Kirchhof

/

Bos dann henner ons nei di Kärch macht, sen fast
lötter Weiwer, meistens ällere, zwädrei ällere
Männer, bu mei Herrle guet gekaannt honn
und villedt schu o ihrn Tued deenke, und di
poer Kenner vu n Kärfich.

Noech en letzte Krözzeiche, noch en di Kerch dem,
bei n Nausgen, wern Heend geschüttelt. Fort is
di Odocht, bi bann jeder deenkt: Mere ko ich
zont für dän Tuete jo doch nie getu.

Ouf n Kärfich und hoiwärts werd geschwatzt,
zegoer gelacht. Ze mei Mutter: "Deß de ner wär
e moel bei ons bist. Bi ging s dann zeletzt
mit dein Votter?" Ze mir: "Si sind ja ganz schön
grueß geworden, seit De in Sommer früher immer
da gewäsen bist." Bi s Maarile sich ostrengt,
hochdäütsch ze schwatze und römsücht, bi se mich
Studirte titelir söll, der bu vür zwanzig Joehr
nere "der Anne ihr Jong" gehässe hot!

titelir=titulier
anreden

S Sterwe is villedt s letzte, bu vu s alte
Lawe ouf n Duurf noch gebliwe is.

S Läuete is annerscht.

